

AKASHVANI AIZAWL
REGIONAL NEWS BULLETIN
HEADLINES (EVENING)

- Chin state khaw thlang lama July ni 5 atanga Chin ralthuam keng pawl pahnih an inkah avanga Zokhawthar a Myanmar mi raltlante chu a tam zawk an kir chho leh tawh.

- Tun dinhmunah Mizoramah Covid hri kai mi 4 an awm mek a, kuminah Covid hri kai 11 awm tawh a, mi 7-te chu enkawl dam an ni tawh.

- Health Minister Pi Lalrinpuin nimin khan Mizoram State Positive Network (MSPN) , Aijal Club-ah a tlangzarh.

- President Droupadi Murmu-in Rajya Sabha member tur mi 4 a rawt.



CHIN CONFLICT

Chin state khaw thlang lama July ni 5 atanga Chin ralthuam keng pawl pahnih an inkah avanga Zokhawthar a Myanmar mi raltlante chu a tam zawk an kir chho leh tawh.

Zokhawthar VCP Pu Laldinthara'n Akashvani Aizawl a hirih danin nimin khan raltlan 2,400 vel chu Myanmar a Chin state-ah an kir leh tawh a. Vawiin lamah pawh a hlawp ni lovin kir chho chu an awm reng niin a sawi bakah Zokhawthar a la chambang chu awm bawk mah se an tlem tawh hle niin a sawi a ni. Police chhinchhiah danin nimin chawhma dar 9 vel atanga tlai dar 5 leh a chanve thleng khan raltlan 2,319-in Tiau lui kanin Myanmar an lut a, raltlan kir lehte hi hmeichhia 1,132 leh mipa 1,197 an ni a. An lo luh lama an lo chhinchhiah ang bawkin kir lehte hi Zokhawthar Police leh Assam Rifles-te'n an lo chhinchhiah zel a , Vawiinah khan chawhnu dar 12 leh a chanve thlengin mi 70 an kir chho leh tawh bawk. Police chhinchhiah dan chuan July ni 5 atanga kar kalta Ningani thleng khan raltlan 3,892 lo lut an awm a, naupang chhinchhiah hmaih erawh a awm theih thu an sawi ani.

Chin National Defence Force (CNDF) in Chinland Defence Force (CDF)-Hualngoram inkulhna kap a, an inkulhna hmun 8 an laksak vek avanga raltlan an ni hlawm a. Hriat theih chinah CDF-Hualngoram mi 2 chu inkahna-ah hian an thi a, mi 5-in hliam an tuar a, CNDF mi 2 an hliam bawk . Hliam tuar zawng zawng hi Mizoram lama hruai an ni a, pakhat na zual deuh Champhai district hospital a enkawl tih loh chu Zokhawthar a enkawl vek an ni.

Zokhawthar VCP-in nimin lama a sawi danin CNDF hovin Ningani zana an khaw awpte an chhuahsan hnu khan Khawmawi a awm Hualngoram People's Organisation (HPO) hruaitute'n an khua a kir leh duh an awm leh awm loh lo hriatsak tura an ngen angin an puang a. Kir leh duhte chu nimin atang khan an kir leh tan ta a ni.

Hetih lai hian Champhai district chhimlam East Tuipui assembly bial chhunga Saikhumphai, Vaphai leh Farkawn a Myanmar raltlan 850 vel erawh chu an ramah an la kir thei rih lova, per Saikhumphai a YMA hruaitute hnen atanga thu dawn danin Tiau kam leh lama inkulh Chin National Army (CNA) mite'n raltlante hi kir chhoh an la remti lova, an thlawhhma a an tulzia sawi a wawiina chhoh dilte pawh chinfel tur an la neih chhuanlamin kir an la phal lo niin an sawi.

An thurualpui CDF-Hualngoram ho CNDF-in Khawmawi, Rihkhawdar leh a chheh vel khua an kah tuk, July ni 6 khan CNA-te hian Saikhumphai leh Vaphai epa awm Chin state a Leilet khaw bula CNDF inkulhna hmun 'Camp Rihli' an tih chu an kap ve nghal a. Rei fe an inkah hnuah Camp Rihli hi la-in an hal a. CNDF mi leh Myanmar sipai an tantir mekte chu Mizoram lamah rawn tlanchhia-in Saikhumphai-ah an rawn lut a, thenkhat chu Vaphai khaw lamah an tlang bawk a. An tlanchhiatna-ah hian Tiau lui lian hleuh kai ve thei lo mi 4 chu tui-ah an tla a, CNA lamin zawn an phalsak hnu-ah mi tlawmngate'n an ruang hi an zawng chungin wawin thlengin ruang pakhat mah an la hmu rih lova. July ni 5 a CNDF-in Khawmawi leh a chhehvel an run lai a Mizoram a rawn kir tum pakhat pawh Zokhawthar bul Tiau lui-ah tho tla-in a ruang hi an la hmu lo a ni.



BIOMETRIC ENROLMENT

Mizorama Myanmar raltlan awm mekte kutzia leh mit naute thla la a chhinchhiah hna chu tan theih thuai tum a ni.

Home department hotute'n an sawi danin Myanmar raltlante biometric enrolment hmanga chhinchhiah tur atan hian ruahmanna peih thawkhat tawh a ni chungin a bul tanna tur a nih avangin hmanraw lamkhawm leh ngai neuh neuh a awm avangin an la tan mai thei lo a. July thla chung ngei a hna tan hman an tum a, a ni tak erawh chu an la sawi thei lo thung ani. Biometric enrolment tur hian district tina bawrhsap kaihhruai District Level Committee on Displaced Persons chu mawhphurtu a ni dawn a. He committee hnuai-ah hian a taka hna kalpuitu tur Biometric Enrollment of Displaced Persons ti a vuahin nodal officer ruat zel a ni a. Nodal officer kaihhruaina hnuai-ah hian bawrhsap pisa leh district SP pisa a thawk thlan bikte bakah raltlan awmna khaw tina VC leh YMA hruaitute chu mawhphur tura ruat an ni.

Tun hnai a Zokhawthar bakah Vaphai, Saikhumphai leh Farkawn lama raltlan lo lut belhte tiam lovin tunah hian Myanmar raltlan 32,000 chuang hret an awm ni a chhinchhiah a ni.



COVID SITUATION

Tun dinhmunah Mizoramah Covid hri kai mi 4 an awm mek a, kuminah Covid hri kai mi 11 an awm tawh a, an zinga 7-te chu enkawl dam an ni tawh.

Health & family welfare hnuai a integrated disease surveillance programme (IDSP) thuneitute sawi danin Ningani khan Covid hri kai ni a rinhlelh mi 7 an endik zinga 1 chuan hri a kai tih hmuhchhuah a ni a, Zirtawpni khan mi 5 an endik zinga 2 in an kai tih hmuhchhuah leh niin nimin khan hri kai pakhat hmuchhuah leh ani. Covid hri kaite hi Aizawl district ami vek an ni a. Hri kai tih lang chhuak nasa an awm lova, damlo na tak leh enkawl zui ngai lutuk an awm baw lo niin an sawi. Mizoramah hian kumina Covid hmuhchhuah leh hmasak ber chu May thla laihawla mi 2 hmuhchhuahte kha an ni a. June thla chho khan hmuhchhuah leh an awm baw lo a, vawiinah khan Covid inrinhlelh avanga thisen endik an awm lo niin IDSP hotute chuan an sawi.

Covid hri len vanglai, kum 2020 March thla chawhnu lam atanga intan kha nikumah kha chuan a zia-awm hle tawh a. Mizoramah chuan nikum chhung khan Covid hri kai mi 74 awmin a, thihpui n an awm lova, October thla atanga kumin May thla laihawl thleng khan hri kai hmuhchhuah an awm lo ani. Covid hri leng avang khan Mizoramah mi 734-in an thih phah a, kum 2021 kha thihpui tam ber kum niin mi 538 an thi a ni.

Mizoramah vawiin thleng hian Covid hri kai leh kai lo sample nuai 19, sing 9, sang 7 leh 739 endik a ni tawh a, an zinga mi nuai 2, sing 3, sang 9 leh 646-te chuan hri an kai tih hmuhchhuah a ni a, mi 734-in thihpui-in mi nuai 2, sing 3, sang 8 leh 908 te chu an dam chhuak leh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

HIVDS

Health Minister Pi Lalrinpui chuan nimin khan Mizoram State Positive Network (MSPN) chu Aijal Club-ah a tlangzarh a, Mizoram State AIDS Control Society (MSACS) Project Director Dr. Jane R. Ralte pawh a tel a ni.

Pi Lalrinpui chuan Mizorama HIV veite inzawmkhawmna leh intihchaktawmna tur pawl din a ni chu lawmawm a tih thu sawi a. HIV veite tan mahni dinhmun inpawm leh nunpui thiam a pawimawh thu leh, hmalam hun thlir thiam tura fuihtu an mamawh thu sawiin, hemi atan hian anmahni dinhmuna ding ve leh an tawn ang lo paltlang ve tawhte chu an tangkai hleani ati a, HIV hrik paite'n Antiretroviral therapy (ART) tha taka an lak chu sawrkar pawhin a ngaih pawimawh thu sawiin, a thlawna ART lak theihna Centre 14 ZMC&H, Kulikawn Hospital, Synod Hospital leh District Hospital tinah te buatsaih a nih ati a, HIV kaihnawih natna dang laka an him theih na'n leh midang an kaichhawn loh na'n ART tha taka lak a pawimawh thu a sawi baw lo.

Mizorama ruihhlo rawn lut nasa chuan thil tha lo tam tak a kentel thu leh HIV pawh a tih darh nasat phah thu tarlangin, ruihhlo rawn lut tur dan a pawimawh zia leh ruihhlo ti lo tura inzirtirna zau zawk kalpui a pawimawh thu a sawi bawh a. Sawrkar chuan HIV darh zel tur ven leh inzirtir lamah nasa takin hma a la tih sawiin, hemi kawngah hian MSPN pawh chak zawka tan la turin a sawm a ni.

Dr. Jane R. Ralte chuan Mizorama mihring awm zat atanga chhutin (prevalance) HIV vei mi za zel 2 point 73 an awm mek tih sawiin, India ram puma a sang ber a nih thu leh HIV vei thar (incidence) erawh kum 2018 atangin an tlem tual tual thu a tarlang a. HIV hrik kai a inrinhlehna nei an awm chuan inentir vat a pawimawh thu leh hri an kai a nih chuan ART tha taka lak a pawimawh thu a sawi bawh.

<><><>

PRESIDENT MURMU NOMINATES FOR RAJYA SABHA

President Droupadi Murmu-in Rajya Sabha member atan mi 4 – ukil lar Ujjwal Deoraon Nikam, Social Worker C. Sadanandan Master, Foreign Secy hlui, Harsh Vardhan Shringla leh historian, Dr. Meenakshi Jain-te a rawt.

Ministry of Home Affairs thuchhuah tarlan danin, ukil Pu Nikam-a hi Maharashtra mi a ni a, Mumbai-a a firfiaka chetna thleng thubuaiah khan sorkar counsel a ni. Kerala mi C. Sadanandan Master hi education lamah hun rei tak a thawk tawh a, politics thil avanga tharum thawhna chhuak tuartu niin a ke pahnih a chan phah a ni. Foreign Secy hlui Pu Shringla hi United States, Bangladesh leh Thailand-ah te Ambassador-in a awm thin a, kum 2023-a India-in G20 Presidency nihna a chan lai khan Chief Coordinator a ni. Dr. Meenakshi Jain hi Gargi College, University of Delhi-ah history Associate Professor-in a thawk thin a ni.

Prime Minister Narendra Modi-a chuan Rajya Sabha member atana President-in a chhawp chhuah mi 4-te chu mi chhuanawm tak tak an nih thu sawiin lawmpuina a hlan a ni.

<><><>

ODISHA COLLEGE GIRL SELF IMMOLATION

Odisha Balasore Dist-a Fakir Mohan Autonomous College-a zirlai hmeichhia chuan an assistant professor-in a khaikhem thin nia sawiin a inhal a, a taksa hmun zaa 90 chuang a kan avangin a dinhmun a ngaihtuahawm hle nia sawi a ni a, Bhubaneswar-a AIIMS-ah thawn a ni. Amah chhan tumtu zirlai mipa pawhin hliam na tak a tuar a, assistan professor hi police-in an man tawh a ni.

He thil thleng avang hian Odisha sorkar chuan he College principal leh assistant professor-te chu a suspend nghal a, eptu party BJD leh Cong chuan Bhubaneswar-ah lungawilohna lan tirin Odisha Chief Minister leh Higher Education Minister ban an phut a ni.